

Tutu é kuvi ūvi e táxnūu San Pedru

Taxnūu Pedru tú'un iña ña ntákuinti'xe i

1 Xu'u é Simuun Pedrú u ne, kade tsiñu ú iña Jesúcrístú ne, pustrú u iña ña. Taxnūu u tú'un sa'lá iña nto, tsi é nī'i nto é dadii kuínti'xe nto nī kó, tsi dóo vá'á ó de Xuva ko ni Jesúcrístu, ña é nakáku kō ne, ñá kāde ña kuenta xoo ná'a o. ²Dií dií ka kue'e na tā'xí Xuva kō é vā'á iña nto, é kuntōo vá'a nto, tsí ini nto Xuva kō ne, iní nto Tó'o ko Jēsuú dī.

Nte ntáa ña ntákuinti'xe i

³Tsi dóo ntii iní Xuva kō né, ta'xi ña kō é un nti'ī é kantio kō é nī'i ko ntuví va'á iña ko, é un nti'ī é kantio kō é vii o é vā'a, tsí ini o ña. E kána ña kō, tsi dóo ka'nu ña ne, dōo va'á ña dī. ⁴Dukuān ne, e tá'xi ña ko xū'u ña é vii ñá nuu i e dóo ka'nu, nuu i e dóo nuu á'vi i, vata koo é ntuvá'a nima ntó vata kaa mii ña, te xtuví mii nto é kánatívi ñuxiví san é ntio nima kíni ntáa nto. ⁵Dukuān né, di'na na kuínti'xe nto ne, kidáa né, kanñi nima nto vii nto é vā'á dī. Kidáa né, nakuā'a ká nto vata koo é kutu've nto iña Xuva kó dī. ⁶Ñá víi ka nto vatā ó ntio

nima kíni ntáa nto. Na kūtíi nto é un nti'ī né, kunuu iní ntó Xuva kō. ⁷Kuinima ntó ta'an nto, ña kuínti'xe i sán ne, kuinima ntó da xōo ka ña'a dī.

⁸Tē ini nto nuu i sá'a ne, kuān koo vii nto utén utén ne, kunuu á'vi ntuvi iña nto. Ñá tē é ntaā i é ini nto Tó'o ko Jesúcrístu. ⁹Xoó ña'a, ña é ña káde nuu i sá'a ne, vata kaa ña kuāa kaa ña, vata kaa ña é ña káxi'i va'lá nuu i. É kūnaá ini ña tsi é ntuntoo nima ñá kuétsi é edé ña kídaa. ¹⁰Dukuān né, ta'an ko, dií dií ka ntukū nuu iní nto é kūtuni vá'a nto tsí nuu é ntaā i é nakaxnúu Xuva ko ntō, e kána ña nto. Te kuān koo víi nto ne, ñá kō'xó ntéé ka nto nuu i é kíni kaa. ¹¹Kidáa ne, ña kada vini kué'en tsi Xuva kō é kī'in nto mí kadē kú've Tó'o ko Jesúcrístu, d'vi ñá é nakakū ñá ko, ntii dañu ntūvi.

¹²Dukuān ne, nguentúvi nanu'u u iní nto nuu i sá'a, kuān te é ini nto, kuān te ntákuinti'xe vá'a nto é nuu é ntaā i e téku nto. ¹³É vā'á, kuini ko, é ká'an ka u é naka'an ntō sá'a, dá tuví ka u ñuxiví san. ¹⁴E tá'xi Tó'o ko Jesúcrístu é kūtuní ko tsí ña na'á ka kutuví u ñuxiví sa. ¹⁵Dukuān ne, kaxió ntii u é nakuā'a

va'a ú nto sá'a vevíi, vata koo é naka'an nto nūu i sá'a rkontuvi dá xoxó ka u.

Iní nti e dóo ka'nu Cristu

¹⁶Tū'un é nañe'é nti nto kuenta iña i é nainu xtúku Tó'o ko Jesūcristu é ña te nté kaa ntii iní ñá ne, ñá te ni tává diki mii nti, tsi iní nti ntuxnúu mii nti Tó'o kō e dóo ka'nu ña'a ña. ¹⁷Tsi xé'e Xuva kō e dóo va'a iña ña, é kuiko ñu'u o ña. Tsi díto nte e dukún kan vē'xí tatsin Xuva ko, kaká'an, "Sá'a I'xá mii ko e dóo kakuinimá ko, e dóo diní ko ni ñá", ka'an. ¹⁸Nti'í ne, tēkú nti tatsín san é vē'xí nte e dukún kán, tsí dadii ntoo ntí ni ñá rki uku kuikó san.

¹⁹É kūtuni ko tsí nuu é ntaā i é ntáka'an ná'a san kídaā, ña é ka'án naa Xuva ko. Vá'a ó te vii ntó kuenta tú'un e ntáka'an ñá san, tsí vata kaa ñu'u é kaxi'í nuu mí nēé san é dā nté xēe ntúvi tē naínu xtúku Cristu é nāxi'í nuu ña nima nto. ²⁰Ntá tsi di'na kantio é kūtuni nto tsi tú'un é úve na'a kaká'an Xúva ko kuēnta iña nuu i é kúvi ne, ñá te da xōo ka ña'a ni tává diki mii ña. ²¹Tsí ña é ká'án naa Xuva ko kídaā ne, ñá te diki mii ña ni tava ña é ntáka'an ña, tsí Espiritū Sántū san nañe'é ñá ña nté koo ka'an ña.

Ña'a, ña e ntánañē'é dovete

(Judas 4-13)

2 Ntá tsi kídaā ne, xíó ña'a e táva diki mii ña é ká'an ñá dovete ne, kuān koo víi ña'a san ni ntó di. Naku'a ña nto tú'un é ña te tú'un Xuva kō. Nakua'a xu'ū ñá nto nchú'un vetē é kaido doxi'i. Ká'an

ñá tsí ña te Xuva kō ña é nakakū ña. Ntá tsi kantí'i tsi nakūnaá mii ñá kúñu ña. ²Ñá te da dii ña'a kuntíkin ñá ña é vii ña é kini kaa vatā ó de ña di. Kuenta iña ñá ne, ká'an kini ña'a san iña itsí va'a san. ³Dóo ntio ña diu'un ne, nañē'e ñá nto tú'un é kúdií dovete vata koo é kukuika ña kuēnta iña nto. Ntá tsi nte éma tsi iō tu've é ntō'o ña. Ña ná'a ka dá ni'i ñá doxi'í san.

⁴Ñá ni de ka'nū iní Xuva ko ni ánjē san é ede é kini kaa, tsí nakuíta nuu ña i dō'vi kan mí nēé kue'en, mí ku'un kutu dā nté xēe ntúvi é xntēkú kū've Xuva ko ún ntíí ntíí ña'a. ⁵Ñá ni ntuntá'ví ini ña ñatā, ña intóo kídaā di. Mii tsi Noeé san é ká'an ntódo ña tú'un va'a san ne, náakakú Xuva ko ña, ni ū'xe ñá'a ká, dā naxntekū ñá ntute é nakūntéku teni dá kanií ñūxiví san, mi ntántoo ña kini ntáa san. ⁶É'mi kue'en Xúva ko ñūú Sodomá, ni ñūú Gomorá di. Ntāda ña xaa é un ntí'í, vata koo é na kiní ña kini ntáa san nté koo nto'o ña di. ⁷Ntá tsi nakáku ña ña é naní Loó san, tsi dóo va'a ña'a ña. Dōo u'vi kúvi ña tsi dóo ntáde xení ña'a san.

⁸Dóo dutsi kuíni ña ntáduku ntée Xuva ko san dā iní ña nté o de ña ñuú ña, da téku ña e dóo ntáka'an káni ña'a san. Nté émá tsi ña ni ntio kue'en ña nté o de ña ntántoo ni'i ña. ⁹Ini Xúva kō nté koo nakáku ña ña ntáduku ntée ña da ntántoo ña. Ini ña nté koo kué'e ña é ntō'o ñá kini ntáa sán di dā nté xēe ntúvi é xntēkú ku've ñá ña'a san. ¹⁰Dií dií ka kué'e ña é ntō'o ña ntáde e ntáka'an níma káni ntáa ña, iña ña é ña ntaíko ñu'u ña odo nūu iña ña.

Ñá tē ntákuka'an nuu ña; ntáde ña da nēé ka nuu i é ncho víí ña. Ntē ña ntaú'vi ña é kā'an ntee ña ña é odo nūu e dukún kān. ¹¹Ntá tsi mii ánĵē sán ne, kuān te díí ka ntii iní ñá ne, kuān te díí ka kuvi víí ña ne, ntá tsi ña te ntáka'an ntée ña ña nuu Xuva ko.

¹²Ntá tsi ña kuān ntáa sán ne, vata ntáa kiti é ña tuví nee ntáde kuení ti ntáa ña. Ntáde ña vata tsi káan iní ña. Kiti sán ne, ntánakaxa ti ne, da ntátiin ña ti ne, da ntaé'ni ñá ti. Kuan ntáa ña di. Tsi ntáka'an káni ña nuu i é ña ntákutuni vá'a ña ne, kuān tsi koo kuví ña di vatā ó kaxi'i kítí san. ¹³Nto'o ñā dí vata tsi ō nánto'o ña ña nguí san. Dōo diní ntoo ña vata tsi káan iní ña, da nēé ka tsi ura. E dóo dentu ña. É kuíni ña e ntáde ña doka'an ne, dōo diní ña ntaé'ni nta'ví ña nto da ntaé'xi dadíi ña ni ntō.

¹⁴Da xōo ka ñadř'i ntaíni ña ne, ncho kini díki ña ña. Ñá kantā'á ña e ntáde ña é káni kaa. Ntáde ña vata koo é kuntikin ña'a san ña, ña é vata kutú've vá'a i iña Xuva ko. É kütú've ña é ki'i ña da nēé ka nuu i é ntio ña. Ntá tsi dóo ni'i ña é nto'o ña nta'a Xuva kō. ¹⁵Xtuví mii ña itsí va'á san ne, dá dotō tsi ntaíka ña. Ntáde ña vatā o dé Balaan, i'xá Beu, ña e dóo ntío i é ni'i diu'un dá edé ña é káni kaa. ¹⁶Ntá tsi uun buru de tíi ti ni ña kuēnta iña kuétsi ñā. Kuān té ña kuvi ká'an búru sán ne, ntá tsi ní'i ti tatsin ñá'a, kaka'an ti é ña ku dé ka ña é káni kaa.

¹⁷Ña kuān ntáa sán ne, vata ntáa pusu é itsi núu ntáa ña, vata ntáa viko é kue'en ni'i tatsin. Ní'i ña é ntō'o ña ntii dañu ntuvi dá kuntōo

ñā mi dóo nēé kue'en, e xtúvi tu've Xuva ko iña ña. ¹⁸Tsí da doto tsi ntáka'an ñá nuu i e dóo na'nu ne, ntáde ña é kō'xó ntēé xtuku ña'a san nuu i é káni kaa, ña é dā vé kii nteé xio ta'an ña e ntáde é káni kaa san. ¹⁹Ntáka'an ñá ni ñā'a san tsí kuvi kaka xaa ña ve, ntá tsi ntáde tsi mii ñā é kāde tsiñu ña iña i é káni kaa san. Tsí da nēé ka nuu i é kuvi vii ni ūun ña'a ne, diví é kúvi tó'o ñā. ²⁰Te xtuví mii ña nuu i é káni kaa é ió ñuxiví san te íni ña Tó'o ko Jesücristu, ña é nakáku kō ne, ntá tsi te káni nuu xtúku ña nuu i é káni kaa sán ne, te kúvi vii é káni kaa san ni ñá ne, da díí díí ka nta'ví de ña é vāta kaa di'na. ²¹Díí ka vá'a ó tē dí ña ni iní kue'en ña itsi vā'á san é xtuví mii ña da rkontúvi é ini ña tú'un Xuva kō é naku'ā ña'a san ña. ²²Kuan kōo kúvi ni ña vatā xkoó ka'an ñá'a san: “Kanakaxí xtuku tñā san e ntú'xen ti. Kanakutsi o kütisín san ne, ntá tsi kanakunúu nto'o xtuku ti nto'xo san”, xkoó ka'an ñá'a sán di.

Nainu xtúku Tó'o kō

3 É uvi ito táxnūu u tú'un san iña nto, ení ko e dóo ntio kó nto. É uvi ito kaka'án u ni nto sā'á vata koo é kuntitō nto é kadā kuení va'a nto. ²Nanū'u ntó iní nto nté ō ntáka'an ñá'a, ña é ka'án naa Xuva ko kídaa, ni tū'un e xtúvi Tó'o kō, ña é nakáku kō, é nañé'e ñá kō.

³Di'na kutuni va'á nto sá'a: tē xee ntúvi é dokó sa ntí'i ñuxiví san ne, ki'xi ña'a ña é narkíntēé Xuva kō, ña é dotō tsí vii é ntio nima káni ntáa í ne, ⁴ká'an ñā: “¿Nté ntu ō kúvi ni tū'un é kākā'án Cristu é

nainu xtúku ña? Un tsi nte dá xi'í úvata ika kō né, kuan tsí ó kakuvi vata ō kúvi nte ntúvi dá iñi ntu'u ñūxiví sa", koo ka'an ña. ⁵Ña kuān ntáa sán ne, ñá ntío ña kutuni ñá tsi nté ntúvi di'na xtúvi Xuva kō é kōo e dukún kan ni ñūxiví sa. Nté iní ntute kan vē'xi ne, mé'ñū ntute san túvi di. ⁶Ntá tsi ntute san kúvi ide é nakunáa ñuxivi e itúvi kídaa dá nākuntéku. ⁷Ntá tsi xtúvi xtuku Xuva ko, kāka'an ña tsí e dukún kan ni ñūxiví sa é ntoo veví ne, é natsoo va'a ña é kā'mi ña ntuvi dá xntékú ku've ñá iña ña'a, ntuvi dá nantí'i ña ña'a, ña é ña ni kuintí'xe i ña.

⁸Ñá ku kūnaá ini nto sá'a, ení ko e dóo ntio ko, tsi é uun ntuvi ne, vata kaa uun míil kuia, kuini Tó'o kō ne, uun míil kuia ne, vata kaa uun ntuvi, kuini ña. ⁹Ñá te kanakuí Xuva kō é kāda ntaa ña tú'ūn e tá'xi ña xu'u ña. Ió ña'a sán ne, kuān o ntádē kuení ña. Ntá tsi Xuva kō ne, kantétu ña kuenta iña nto dá kuii dá kuii tsí, tsí ña ntío ña é kūnaa nté uun ña'a. Ntio ña é natívi iní un ntí'ñí ña'a san kuétsi ña.

¹⁰Ntá tsi xee ntúvi te vēxkada kú've Tó'o ko ñūxiví sa. Da nēe ini tsí kō nainu ña vata kaa uun ña du'u. Kídaa né, uun ito tsi ntí'i e dukún kán é dóo donchu'vi koo kañú'u ne, uun ito tsi koko kue'én da nēe ka ntí'i é ió ñuxiví sa di.

¹¹É ini o tsí kuan koo kuvi nī é un ntí'í né, idukuān ne, víi nto é

vā'á, víi nto da mii kuē'en tsi é ntio Xuva kō ¹²da ntantétu nto ntuvi é ntixkada kú've Xuva kō! Víi nto vata koo é nainu kantí'i ña. Ntuvi tsikán ne, koko e dukún kán ne, naku've é un ntí'í. ¹³Ntá tsi tá'xi ña xu'u ña tsí koo e dukún xēe ni ñūxiví xēe san, mí'í é ña te nté kaa vá'a koo. Sá'ā e ntántétu ō.

¹⁴Dukuān ne, ení ko e dóo ntio kó, nīi dukuān ntantétu nto é kuān koo kuvi sá'ā né, koo ntii nto víi nto é vā'á san vata koo é kuvi ka'an Xúva kō tsí ña tuví nee nuu i é ña vā'ā nima ntó, ntē ña tuví nee kuétsi ntó, tsí ntoo vá'a nto. ¹⁵Kiní nto tsí da kuii dá kuii tsi kántétu Xuva kō vata koo é nakáku ō. Kuān ó kaka'an tá'an kō Pablú san di, ña e dóo ntio ko, da táxnū ña tutú iña ntó, vata ō xe'é Xuva kō e dóo ki'in iní ña. ¹⁶Un ntí'ñí tutu é kataxnū ña ne, é kākā'an ñá iña i sá'a. Ió nuu i e dóo vi'xín ō é kākā'an ña. Ña e ñá ini, ña é vāta kuinti'xe vá'a i ne, ntánadama ña tú'ūn Pablu, vātā ó de ña ni tū'ūn Xuva kō é nguíi san. Ntá tsi kuenta iña mii ña é k'í'in ña dō'vi kan.

¹⁷Dukuān ne, ení ko e dóo ntio kó, di'na kutuni nto sá'ā ne, koto nto te ña kuntíkin nto ña'a, ña e ntáde nuu i e dóo xii kaa, vata koo é ña xtuví mii nto é kuinti'xe vá'a nto, ¹⁸tsi díi díi ka kutu've nto iña Tó'o ko Jesūcristu, ña é nakáku kō. Ká'an ō veví ni ntii dañu ntúvi tsi dóo ka'nu ña. Kuan tsí koo é kā'án u ni ntó.